

Na osnovu člana 23 Statuta Brčko Distrikta ("Službeni glasnik Brčko Distrikta BiH" broj 1/00), Skupština Brčko Distrikta BiH na 54. sjednici održanoj 13. decembra 2002. godine, usvaja

## **Z A K O N O DJEČIJOJ ZAŠTITI BRČKO DISTRIKTA BOSNE I HERCEGOVINE**

### **I. OPĆE ODREDBE**

#### **Član 1**

Dječija zaštita ima za cilj da se svakom djetetu osiguraju približno jednaki uslovi za zdrav i pravilan tjelesni, intelektualni i emocionalni razvoj u porodici.

#### **Član 2**

Pravo po ovom zakonu ostvaruju lica koja imaju prebivalište na području Brčko Distrikta Bosne i Hercegovine (u daljem tekstu: Distrikt).

#### **Član 3**

Porodica u smislu ovog zakona je životna zajednica roditelja i djece i drugih srodnika. Porodicu čine krvni, tazbinski i adoptivni srodnici bez obzira na stepen srodstva.

#### **Član 4**

Prihodom u smislu ovog zakona se smatra ukupno neto primanje ostvareno u toku jedne godine.

#### **Član 5**

Ukupan prihod domaćinstva čine prihodi koje članovi ostvaruju po osnovu:

1. plaća i drugih primanja iz radnog odnosa;
2. starosne invalidske i porodične penzije;
3. poljoprivredne djelatnosti;
4. primanja po propisima o boračko-invalidskoj zaštiti i zaštiti civilnih žrtava rata;
5. prihoda ostvarenih po osnovu imovinskih prava;
6. dopunskog rada.

Prihod od poljoprivrednih djelatnosti u smislu stava 1 tačka 3 ovog člana smatra se katastarski prihod iz prethodne godine koji se dijeli na dvanaest (12) mjeseci s brojem članova domaćinstva.

Prihod ostvaren po osnovu imovinskog prava u smislu stava 1 tačka 5 ovog člana smatra se prihod ostvaren prodajom imovine ili davanjem u zakup ili najam.

Prihodom u smislu stava 1 ovog člana ne smatra se novčana naknada po osnovu invaliditeta za tjelesno oštećenje, novčana naknada za pomoć i njegu od drugog lica, doplatak za djecu i stipendija učenika i studenata.

### **Član 6**

Prosječna plaća u smislu ovog zakona definiše se kao ukupna plaća u toku jedne godine podijeljena na 12 mjeseci.

### **Član 7**

Posebna zaštita u smislu ovog zakona je, društvena zaštita i poseban tretman prema djeci bez roditeljskog staranja ili bez jednog roditelja, djeci ometenoj u fizičkom ili psihičkom razvoju, te djeci čiji je roditelj invalid.

## **II. PRAVA U OBLASTI DJEČIJE ZAŠTITE**

### **Član 8**

Prava u oblasti dječije zaštite u smislu ovog zakona su:

1. naknada plaće za vrijeme porodiljskog ili produženog porodiljskog odsustva i odsustva sa rada zaposlenog roditelja i usvojioca radi njege djeteta;
2. majčinski doplatak;
3. pomoć za opremu novorođenčeta;
4. doplatak za djecu;
5. posebni psihosocijalni tretman bračnih drugova koji žele djecu i trudnicama.

*1. Naknada plaće za vrijeme porodiljskog ili produženog porodiljskog odsustva i odsustva s rada zaposlenog roditelja i usvojioca radi njege djeteta*

### **Član 9**

Naknada plaće ženi-majci, odnosno ocu, usvojiocu ili staraocu djeteta u radnom odnosu za vrijeme dok odsustvuje s posla radi trudnoće, porođaja odnosno njege djeteta ostvaruje se u skladu s propisima o radnim odnosima koji važe u Distriktu.

### *2. Majčinski doplatak*

### **Član 10**

Pravo na majčinski doplatak ostvaruje svaka majka, osim majke u radnom odnosu koja ima pravo na naknadu plaće za vrijeme porodiljskog odsustva.

Majčinski doplatak se isplaćuje u trajanju od tri mjeseca i iznosi 15% od prosječne plaće u Distriktu, utvrđene prema posljednjem objavljenom podatku Uprave prihoda Brčko Distrikta BiH (u daljem tekstu: prosječna plaća).

## Član 11

Pravo na majčinski doplat, u skladu s ovim zakonom, ostvaruje se za svu djecu u porodici u trajanju od 90 dana (3 mjeseca) od dana rođenja djeteta na osnovu podnesenog zahtjeva.

Ako lice iz člana 10 ovog zakona podnese zahtjev za majčinski doplat u roku od 30 dana od dana rođenja djeteta, pravo na majčinski doplat ostvaruje od dana rođenja djeteta, a ako zahtjev podnese poslije tog roka, pravo ostvaruje od prvog dana u narednom mjesecu.

Ukoliko lice iz člana 10 ovog zakona podnese zahtjev poslije isteka roka od 90 dana (3 mjeseca) od dana rođenja djeteta, ono ne može ostvariti pravo na majčinski doplat.

### ***3. Pomoć za opremu novorođenčeta***

## Član 12

Pravo na pomoć za opremu novorođenčeta ostvaruje se bez izuzetka za svako novorođeno dijete u porodici.

Jednokratna pomoć za opremu novorođenog djeteta ostvaruje se u iznosu od 25% od prosječne plaće u Distriktu.

### ***4. Doplat za djecu***

## Član 13

Pravo na doplat za djecu, kao novčano davanje, ima svaki građanin Brčko Distrikta pod uslovima predviđenim ovim zakonom.

## Član 14

Doplat za djecu, u skladu s članom 13 ovog zakona, nema građanin Distrikta koji ima registrovano privatno preduzeće, samostalnu radnju ili se bavi drugim vidom privatne djelatnosti koja podliježe plaćanju poreza ili paušala, kao i lica čija primanja prelaze cenzus od 15% prosječne plaće u Distriktu po članu domaćinstva.

## Član 15

Pravo na dječiji doplat obavezno pripada djetetu do navršene 15 godine ukoliko ispunjava uslove predviđene ovim zakonom.

Djeca starija od 15 godina života ostvaruju pravo na dječiji doplat:

1. ako se nalaze na redovnom obrazovanju u osnovnim, srednjim i višim školama, akademijama ili fakultetu, a najduže do navršene 26. godine;
2. ako su nesposobni za samostalan život i rad, a nesposobnost je nastupila do 15. godine života ili u toku redovnog obrazovanja, za cijelo vrijeme trajanja nesposobnosti.

Dječiji doplat isplaćuje se i za vrijeme školskog raspusta.

## **Član 16**

Dječiji doplatak ne pripada djeci koja su smještena u ustanove dječije i socijalne zaštite.

## **Član 17**

Doplatak za djecu pripada samo za djecu koja imaju prebivalište ili privremeni boravak na teritoriji Distrikta.

## **Član 18**

Pravo na doplatak za djecu ostvaruje se za djecu u porodici u zavisnosti od materijalnog položaja porodice, rasporeda rađanja i uzrasta djece, na osnovu podnijetog zahtjeva.

Nezavisno od materijalnih uslova porodice i redoslijeda rođenja, doplatak za djecu pripada djetetu za koje je nadležni organ donio akt o razvrstavanju zbog ometenosti u razvoju, ako nije smješteno u ustanovu socijalne zaštite.

Pravo iz stava 2 ovog člana pripada djetetu do navršenih 26 godina života.

## **Član 19**

Pravo na doplatak za djecu ostvaruje se od prvog dana u narednom mjesecu u odnosu na podneseni zahtjev.

## **Član 20**

Pravo na doplatak za djecu ostvaruje se:

1. ako porodica ostvaruje pravo na socijalnu pomoć u skladu sa Zakonom o socijalnoj zaštiti,
2. ako ukupan mjesečni prihod po članu porodice ne prelazi 15% prosječne plaće, a katastarski prihod po članu porodice u prethodnoj godini ne prelazi 3% prosječnog katastarskog prihoda po 1 hektaru zemljišta.

## **Član 21**

Djetetu bez oba ili jednog roditelja, porodici koja ima dijete ometeno u fizičkom ili psihičkom razvoju i porodici u kojoj su oba ili jedan roditelj invalid, te samohranim roditeljima, pripada pravo na dječiji doplatak bez obzira na imovinske uslove, uvećan za 50%.

## **Član 22**

Visina doplatka za djecu iznosi 10%, od prosječne plaće ostvarene u Brčko Distriktu BiH.

### **5. Posebni psihosocijalni tretman bračnih drugova koji žele djecu i za trudnice**

#### **Član 23**

Pravo na poseban psihosocijalni tretman bračnih drugova koji žele djecu i trudnice ostvaruje se u porodičnom savjetovalištu oformljenom pri Centru za socijalni rad Brčko Distrikta Bosne i Hercegovine (u daljem tekstu: Centar za socijalni rad).

Za ostvarivanje prava iz stava 1 ovog člana, mogu se osnovati posebne ustanove u skladu sa zakonom.

### **INSTITUCIJA REVIZIJE**

#### **Član 24**

Centar za socijalni rad koji pruža usluge socijalnog rada u postupku rješavanja prava iz oblasti dječije zaštite, može bilo kada izvršiti reviziju nad priznatim pravom korisnika, ukoliko dođe do promjena okolnosti koje utiču na ostvareno pravo.

### **III. DJEČIJA NEDJELJA**

#### **Član 25**

U cilju stvaranja povoljnijih uslova za razvoj zaštite djece i proširivanja njene materijalne osnove uvodi se «Dječija nedjelja».

#### **Član 26**

Prva sedmica u oktobru svake godine određuje se kao «Dječija nedjelja» na teritoriji Distrikta.

#### **Član 27**

Za vrijeme trajanja «Dječije nedjelje» naplaćivat će se doprinosi:

1. 1 % na vozne karte u međumjesnom i međunarodnom željezničkom, brodskom, avionskom i autobuskom saobraćaju,
2. 1 % na ulaznice za pozorišne i bioskopske predstave i sve druge priredbe gdje je pristup dozvoljen s plaćenom ulaznicom,
3. 1 % na ulaznice za sportske utakmice i sportske priredbe,
4. 20 % na poštanske pošiljke u unutrašnjem saobraćaju, osim na pošiljke novina i časopisa.

#### **Član 28**

Naplaćivanje novčanih iznosa utvrđenih ovim zakonom, privredna društva, poslodavci i druga pravna i fizička lica, koja vrše naplatu na području Distrikta, dužna su uplatiti te iznose na poseban račun Budžeta Distrikta u roku od 15 dana po isteku mjeseca oktobra.

## Član 29

Gradonačelnik Brčko Distrikta Bosne Hercegovine, na prijedlog nadležnog odjeljenja koje se bavi poslovima dječije zaštite, uplaćena i osigurana sredstva u Budžetu Distrikta s pozicije «Dječija nedjelja», raspoređuje organizatorima manifestacija i akcija posvećenih djeci i unapređenju razvoja društvene brige o djeci.

## IV. POSTUPAK ZA OSTVARIVANJE PRAVA

### Član 30

U postupku za ostvarivanje prava po ovom zakonu primjenjuju se odredbe Zakona o upravnom postupku, ako ovim zakonom nije drugačije određeno.

### Član 31

O pravima utvrđenim ovim zakonom u prvom stepenu rješava nadležni Centar za socijalni rad.

O žalbi protiv rješenja prvostepenog organa rješava Apelaciona komisija Brčko Distrikta.

Drugostepeno rješenje Apelacione komisije Brčko Distrikta Bosne i Hercegovine je konačno u upravnom postupku i protiv njega se može pokrenuti upravni spor pred nadležnim sudom.

### Član 32

Postupak za ostvarivanje prava po Zakonu o dječijoj zaštiti pokreće se na zahtjev lica, odnosno članova domaćinstva koji su dužni uz zahtjev za ostvarivanje prava utvrđenih ovim zakonom priložiti svu potrebnu dokumentaciju za ostvarivanje konkretnog prava.

Potrebnu dokumentaciju čine:

- Izvod iz matične knjige rođenih za svu djecu,
- Kućna lista,
- Uvjerenje iz katastra,
- Uvjerenje iz Uprave prihoda,
- Izvod iz matične knjige vjenčanih (za roditelje),
- Presuda o rastavi braka (ukoliko je prisutan prekid bračne zajednice roditelja),
- Potvrda o redovnom školovanju za dijete (ili djecu),
- Rješenje o kategorizaciji (ukoliko je prisutno u porodici dijete sa smetnjama u razvoju),
- Ovjera prihoda članova porodičnog domaćinstva s kućne liste (prihodi iz radnog odnosa, penzija i sl.),
- Uvjerenje sa Biro-a za zapošljavanje.

### Član 33

Prava po ovom zakonu pripadaju korisniku od prvog dana narednog mjeseca u odnosu na podnošenje zahtjeva.

### **Član 34**

Korisnik prava po ovom zakonu dužan je da prijavi svaku promjenu koja je od uticaja na ostvarivanje i obim tog prava, u roku od 30 dana od dana nastale promjene.

### **Član 35**

Korisnici koji su ostvarili pravo na dječiji doplatok dužni su dostaviti potrebnu dokumentaciju za produženje prava u revizijskom postupku u periodu od 01. februara do 31. marta svake godine.

## **V. OSIGURANJE SREDSTAVA**

### **Član 36**

Sredstva za ostvarivanje prava iz domena dječije zaštite osiguravaju se:

1. U budžetu Distrikta,
2. Doprinosima,
3. Porezima,
4. Donacijama,
5. I svim drugim načinima u skladu sa zakonom.

Do donošenja odgovarajućih propisa koji će regulisati pribavljanje sredstava iz prethodnog stava, gradonačelnik je ovlašten da donese odluku o privremenim stopama i načinima finansiranja.

## **VI. PRIJELAZNE I ZAVRŠNE ODREDBE**

### **Član 37**

Dosadašnji korisnici koji su ostvarili prava, kao i lica koja su podnijela zahtjev za ostvarivanje prava povodom kojeg nije doneseno rješenje po propisima o dječijoj zaštiti koji su se primjenjivali na teritoriji Distrikta do dana stupanja na snagu ovog zakona, dužni su u roku od šest mjeseci od dana stupanja na snagu ovog zakona, podnijeti zahtjev za ostvarivanje prava po ovom zakonu.

Licima iz stava 1 ovog člana, koja ne podnose zahtjev u roku iz stava 1 ovog člana, prestaje daljnje ostvarivanje prava.

### **Član 38**

Postupci za ostvarivanje prava, započeti prije stupanja na snagu ovog zakona, koji nisu završeni, okončat će se po odredbama ovog zakona.

**Član 39**

Nadležno odjeljenje za poslove dječije zaštite će radi provođenja ovog zakona, u roku od tri mjeseca od dana stupanja na snagu ovog zakona, donijeti odgovarajuće propise i opće akte iz svoje nadležnosti.

**Član 40**

Do donošenja propisa iz člana 35 ovog zakona primjenjivat će se propisi i opći akti iz oblasti dječije zaštite koji su se primjenjivali na teritoriji Distrikta do dana stupanja na snagu ovog zakona.

**Član 41**

Danom stupanja na snagu ovog zakona, na teritoriji Distrikta prestaje primjena propisa o dječijoj zaštiti, koji su se do dana stupanja na snagu ovog zakona primjenjivali na teritoriji Distrikta, izuzev propisa i općih akata iz člana 36 ovog zakona.

**Član 42**

Ovaj zakon stupa na snagu 8. (osmog) dana od dana objavljivanja u «Službenom glasniku Brčko Distrikta BiH».

Босна и Херцеговина  
БРЧКО ДИСТРИКТ  
**БОСНЕ И ХЕРЦЕГОВИНЕ**  
СКУПШТИНА БРЧКО ДИСТРИКТА

Bosna i Hercegovina  
BRČKO DISTRIKT  
**BOSNE I HERCEGOVINE**  
SKUPŠTINA BRČKO DISTRIKTA

Broj: 0-02-022-329/02  
Brčko, 13. decembar 2002. godine

PREDSJEDNIK  
SKUPŠTINE BRČKO DISTRIKTA

**Mirsad Đapo, dipl. pravnik**





This document was created with Win2PDF available at <http://www.daneprairie.com>.  
The unregistered version of Win2PDF is for evaluation or non-commercial use only.